



# Canllawiau'r rhaglen ar gyfer elusennau arbenigol ar Gam-drin Rhywiol ac Ecsbloetio 2023/2024

Diolch i chi am roi o'ch amser i ddeall ai ni yw'r cyllidwr cywir ar gyfer eich elusen.

Darllenwch y ddogfen hon cyn i chi ddechrau ar eich cais, gan ei bod yn esbonio pwy a beth rydym yn ei gyllido, yn ogystal â sut rydym yn gwneud penderfyniadau. Mae gan y canllaw hwn 7 adran:

- 1 Cefndir
- 2 Nifer y grantiau i'w dyfarnu
- 3 Dyddiadau cau ar gyfer ceisiadau am gyllid
- 4 Meini prawf cymhwysedd cychwynnol
- 5 Meini prawf y rhaglen
- 6 Llunio rhestr fer, a meini prawf blaenoriaethu
- 7 Yr hyn nad ydym yn ei gyllido o dan y Rhaglen hon

## [Cwestiynau Cyffredin](#)

Gobeithio bod hyn yn dweud y cyfan wrthy ch o ran beth mae angen i chi ei wybod amdanom ni, ond os oes gennych chi gwestiynau o hyd, anfonwch e-bost atom [enquiries@lloydsbankfoundation.org.uk](mailto:enquiries@lloydsbankfoundation.org.uk) neu ffoniwch ni ar 0370 411 1223 cyn dechrau gwneud eich cais.

Gan ddymuno bob llwyddiant i chi gyda'ch gwaith,

Sefydliad Lloyds Bank yng Nghymru a Lloegr



## 1. Cefndir

Rydym wedi ymrwymo i gefnogi elusennau sy'n helpu pobl sy'n profi problemau cymhleth nad oes atebion syml ar eu cyfer, fel digartrefedd, cam-drin domestig a dibyniaeth. Mae'r materion cymhleth hyn yn gwneud bywyd yn llawer anoddach i bobl; yn dwysáu trawma, yn effeithio ar eu hiechyd, yn arwain at dlodi ac amddifadedd, ac yn atal pobl rhag gallu cyflawni eu potensial.

Rydym o'r farn bod elusennau bach, lleol ac arbenigol yn chwarae rhan unigryw yn y gwaith o helpu pobl i ailadeiladu eu bywydau. Mae eu maint a'u dealltwriaeth ddofn o'r materion cymhleth mae pobl yn eu hwynebu yn eu rhoi nhw yn y sefyllfa orau i gyrraedd, ymgysylltu a chefnogi pobl a chael effaith.

Rydym eisiau sicrhau bod yr elusennau bach a lleol rydym yn eu cefnogi yn gallu ffynnu y tu hwnt i gyfnod ein cyllid. Mae ein rhaglenni'n cyfuno cyllid anghyfyngedig gydag amrywiaeth o gymorth wedi ei deilwra gyda'r nod o helpu i gryfhau elusennau a meithrin gwybodaeth, sgiliau a galluoedd staff ac ymddiriedolwyr. Gan hynny, mae'r rhaglen hon wedi ei hanelu at elusennau sy'n rhoi blaenoriaeth i'w datblygiad.

Gwyddom fod llawer o elusennau sy'n rhoi sylw i amrywiaeth eang o faterion cymhleth mewn cymuned leol. Fodd bynnag, o dan y rhaglen hon, rydym eisiau cefnogi elusennau lle mae'r ffocws a'r rhan fwyaf o'u gwaith yn mynd i'r afael ag un o'r wyth mater (thema).

## 2. Nifer y grantiau y byddwn yn eu dyfarnu

Rydym yn derbyn mwy o geisiadau nag y gallwn eu cyllido mewn unrhyw flwyddyn.

O dan y rhaglen gyllido hon yn 2022/2023, fe wnaethom ddyfarnu 82 o grantiau gyda gwerth cyfanswm o £6.15 miliwn ar draws yr wyth thema.

Cawsom 280 o geisiadau ar draws yr wyth thema, ac roedd 171 (61%) ohonynt yn bodloni ein meini prawf cymhwysedd cychwynnol. O'r 171 o elusennau hynny, fe wnaethom gyllido 82 o grantiau (48% o'r ceisiadau cymwys).

Roedd y gyfradd llwyddiant yn amrywio'n sylweddol ar draws pob un o'r themâu. O dan y thema Cam-drin rhywiol ac Ecsbloetio, cawsom 19 o



geisiadau cymwys a chafodd 10 ohonynt eu cyllido (cyfradd llwyddiant o 53%).

**Ar gyfer y rhaglen 2023/24 hon, byddwn yn dyfarnu cyfanswm o 84 grant. Rydym yn disgwyl y bydd oddeutu 10 o'r rhain yn cael eu dyfarnu i elusennau Cam-drin Rhywiol ac Ecsploetiaeth.**

### 3. Dyddiadau cau ar gyfer ceisiadau am gyllid

Y dyddiad olaf ar gyfer ceisiadau yw **dydd Iau, 25 Ionawr 2024** am 5pm.

Rhoddir gwybod i chi am ganlyniad eich cais erbyn **dydd Gwener 24 Mai 2024**.

### 4. Meini prawf cymhwysedd cychwynnol

Er mwyn bod yn gymwys i gael grant gennym, bydd angen i'ch elusen fodloni'r meini prawf canlynol:

- **Cofrestru fel elusen neu fel sefydliad corfforedig elusennol (CIO)** gyda'r Comisiwn Elusennau. Byddwn yn gofyn am rif cofrestru eich elusen ar ddechrau eich cais.
- **Cael o leiaf un gyfres o gyfrifon blynyddol yn dangos eu bod wedi'u 'derbyn'** ar wefan y Comisiwn Elusennau, ar gyfer cyfnod gweithredu o ddeuddeg mis.
- **Gydag incwm blynyddol o rhwng £25,000 a £500,000** yn eich cyfrifon diwethaf a gyhoeddwyd ar wefan y Comisiwn Elusennau. Mae hyn yn golygu eich holl incwm ac, yng nghyswllt cyfrifon cyfunol, dylai gwmpasu pob endid o fewn y cyfrifon hynny.
- **Bod â chyfrif banc yn enw'r elusen** sydd â llofnodwyr nad ydynt yn perthyn. Os bydd y cais yn llwyddiannus, rhaid talu'r grant i'r cyfrif hwn.
- Bod â **Bwrdd o dri ymddiriedolwr o leiaf** ar waith **nad ydynt yn perthyn i aelodau eraill y Bwrdd** a bod eu henwau'n ymddangos ar eich cofnodion Comisiwn Elusennau.
- Rhaid i'r rhan fwyaf o bobl mewn swyddi o rym (gan gynnwys ymddiriedolwyr, y Prif Weithredwr ac uwch reolwyr) beidio â bod yn perthyn nac yn byw yn yr un cyfeiriad. Os oes partïon cysylltiedig, byddwn yn ystyried y berthynas, gwrthdaro rhwng buddiannau a theyrngarwch, cydbwysedd grym yr ymddiriedolwyr sy'n perthyn, a sut y caiff hyn ei reoli.



- **Peidio â gwneud unrhyw daliad i ymddiriedolwyr**, ac eithrio mân dreuliau.
- **Bod â hanes o ddarparu gwasanaethau, am o leiaf blwyddyn, i bobl 18 oed a hŷn.** Rhaid i chi hefyd fod yn darparu'r gwasanaethau hyn ar hyn o bryd. Os yw eich elusen wedi uno'n ddiweddar, rhaid i hyn fod yn berthnasol i o leiaf un elusen cyn yr uno.
- **Gyda pholisi diogelu ar waith.** Byddwn yn archwilio beth mae diogelu yn ei olygu i'ch sefydliad, sut mae'n cyd-fynd â'ch cenhadaeth a'ch gwerthoedd a'ch dull o ddiogelu ar draws eich sefydliad.
- **Gydag Yswiriant Atebolrwydd Cyhoeddus.**
- **Bod yn sefydliad annibynnol.** Byddwn yn edrych ar unrhyw gysylltiad ffurfiol sydd gennych â sefydliadau eraill, rhiant-gwmnïau, neu strwythurau grŵp. Byddwn yn sicrhau bod gan fwrdd yr elusen sy'n ymgeisio reolaeth lawn dros ei waith ac unrhyw wrthdaro rhwng buddiannau.
- Os oes gennych **grant byw** gyda Sefydliad Lloyds Bank, rhaid iddo ddod i ben cyn **25 Ionawr 2025**.
- **Gweithredu'n bennaf yng Nghymru a/neu Loegr.** Mae'r rhan fwyaf o amser ac arian eich elusen yn cael ei wario ar weithgareddau yng Nghymru a/neu Loegr ac yn helpu pobl sy'n byw yng Nghymru a/neu Loegr.
- **Nid yn cynnwys gweithgarwch crefyddol** fel rhan o'r gwasanaethau a ddarperir oni bai fod yr elusen wedi'i sefydlu i gefnogi pobl o'r ffydd honno'n benodol.
- Bodloni meini prawf y rhaglen a amlinellir isod:

## **5. Meini prawf y rhaglen ar gyfer elusennau arbenigol atal cam-drin rhywiol a chamfanteisio'n rhywiol**

**Rhaid i chi fodloni meini prawf y rhaglen hon er mwyn cael eich ystyried ar gyfer cyllid.**

Prif bwrpas eich elusen yw cefnogi pobl sydd wedi goroesi cam-drin rhywiol a chamfanteisio'n rhywiol lle mae eu profiadau'n effeithio'n sylweddol ar eu bywyd bob dydd.

Rhaid dangos tystiolaeth glir mai eich prif bwrpas, a'r rhan fwyaf o'ch gwaith, yw cefnogi pobl sy'n cael eu cam-drin a'u hecsbloetio'n rhywiol.

Bydd eich elusen yn cefnogi pobl sydd wedi profi ymyrraeth gorfforol wirioneddol o natur rywiol, neu wedi'u bygwth â hyn, boed hynny drwy rym



neu dan amodau anghyfartal neu orfodaeth. Mae'n cynnwys caethwasiaeth rhywiol, pornograffi ac ymosodiadau rhywiol. Neu gam-drin gwirioneddol neu ymgais i gam-drin sefyllfa o fregusrwydd, pŵer neu ymddiriedaeth, at ddibenion rhywiol, gan gynnwys, ond heb fod yn gyfyngedig i elwa'n ariannol, yn gymdeithasol neu'n wleidyddol drwy gamfanteisio'n rhywiol ar rywun arall.

Byddwch yn darparu amrywiaeth o ymyriadau, cysylltiadau a llwybrau i gael gafael ar gymorth arbenigol mewn ymateb i faterion cymhleth eraill sy'n eu hwynebu.

Byddwn yn cyllido'r mathau canlynol o waith:

- Gwasanaethau i bobl sydd wedi goroesi cam-drin rhywiol (e.e. corfforol a/neu ar-lein)
- Gwasanaethau i bobl sydd wedi goroesi trais rhywiol
- Gwasanaethau i weithwyr rhyw
- Cefnogaeth i oroeswyr trais ar sail anrhydedd fel y'i gelwir
- Cefnogaeth i oroeswyr anffurfio/torri organau cenhedlu benywod (FGM/C)
- Gweithio gyda dioddefwyr sydd hefyd yn gyflawnwyr
- Gweithio gyda chyflawnwyr i ailintegreiddio'n ddiogel i'r gymdeithas ar ôl dedfryd o garchar

Rhaid adlewyrchu hyn yn yr amcanion a nodir yn eich dogfen lywodraethu ar wefan y Comisiwn Elusennau, eich adroddiad blynyddol, eich gwefan a'ch sianeli cyfryngau cymdeithasol. Dyma beth fyddwn ni'n ei adolygu i ddeall eich pwrpas.

Fel elusen arbenigol, gallwch ddangos y canlynol:

- **Gwasanaethau cynhwysfawr.** Byddwn yn ystyried ceisiadau lle mae cymorth tymor byr yn arwain at ymgysylltiad sy'n parhau. Er enghraifft, efallai y byddwch yn darparu llinell gymorth ar-lein a fyddai'n arwain at rywun yn cael mynediad at gymorth therapiwtig gyda'r nod o'i helpu i fynd i'r afael â'u trawma.

Byddem yn disgwyl gweld cefnogaeth therapiwtig ac ymarferol un-i-un gan ymarferwyr arbenigol, ynghyd â goruchwyliaeth allanol. Os ydych chi'n darparu cwnsela fel rhan o'ch gwasanaethau, rhaid i chi gofrestru gydag un o gofrestrau achrededig yr Awdurdod Safonau Proffesiynol ar gyfer cwnsela a seicotherapi.

**Nid ydym** yn cyllido sefydliadau sy'n darparu therapi grŵp i oroeswyr trais rhywiol gan fod rhywfaint o dystiolaeth i ddangos bod hyn yn ail-



drawmateiddio a'i fod yn gallu creu atgofion ffug a allai fod â goblygiadau i'r broses cyfiawnder troseddol.

**Nid ydym** yn cyllido cymorth un-tro lle nad oes perthynas hirdymor.

- **Perthnasoedd neu bartneriaethau** dibynadwy. Gwyddom na ellir disgwyl i chi, fel un elusen neu wasanaeth, ddiwallu holl anghenion y bobl rydych chi'n eu cefnogi yn uniongyrchol; fodd bynnag, dylech fod â chysylltiadau dibynadwy â darparwyr neu asiantaethau sy'n gallu helpu pobl i oresgyn yr heriau maen nhw'n eu hwynebu a diwallu eu hanghenion sylfaenol (fel budd-daliadau, gofal iechyd, gwasanaethau cam-drin domestig, ac ati). Pan fyddwch chi'n cyfeirio rhywun at gymorth, rydych chi'n cynnal eich perthynas â nhw ac yn olrhain eu cynnydd i sicrhau bod eu hanghenion yn cael sylw. Byddai hyn yn cynnwys mynediad at wasanaeth Cynghorwr Annibynnol ar Drais Rhywiol, gweithio gyda'r heddlu ac asiantaethau cyfiawnder troseddol a'r MARAC (Cynhadledd Amlasiantaeth Asesu Risg), yn ogystal ag asiantaethau lleol fel tai.
- **Gwasanaethau sy'n canolbwyntio ar yr unigolyn** a chynlluniau personol. Byddwn yn cefnogi elusennau sy'n strwythuro eu cymorth o gwmpas pob unigolyn gan ganolbwyntio ar eu cryfderau ar yr un pryd â diwallu eu hanghenion a'u helpu i oresgyn y rhwystrau maent yn eu hwynebu. Byddwch yn gweithio gyda'r bobl rydych chi'n eu cefnogi i ddeall yr heriau y gallant fod yn eu hwynebu ac i gytuno ar sut byddwch yn eu helpu i ddod o hyd i ffordd o oresgyn yr heriau hynny. Byddwch yn cadw cofnodion ysgrifenedig neu electronig neu ffeiliau achos ar gyfer pob un rydych chi'n ei gefnogi, gan nodi cynnydd yn erbyn gweithgareddau. Dylai eich elusen allu dangos y gwahaniaeth rydych chi'n ei wneud drwy'r cofnodion hyn. Byddwn hefyd yn edrych ar sut rydych chi'n rhannu gwybodaeth ag asiantaethau eraill yn ystod yr asesiad er mwyn lleihau'r trawma wrth i berson ailadrodd ei brofiad sawl gwaith.

## 6. Llunio rhestr fer a meini prawf blaenoriaethu

Yn ogystal â'r meini prawf cymhwysedd sylfaenol a meini prawf y rhaglen a amlinellwyd yn barod, wrth lunio rhestr fer o sefydliadau byddwn yn ystyried pa mor dda maent yn bodloni'r meini prawf blaenoriaethu a ganlyn:

### ✔ **Eich ymagwedd at degwch, amrywiaeth a chynhwysiant**

Gwyddom fod rhai pobl yn wynebu gwahaniaethu oherwydd pwy ydynt. Gallai hyn fod oherwydd eu hoed, anabledd, ailbennu rhywedd, hil, crefydd neu





gred, rhyw, cyfeiriadedd rhywiol, tlodi, dosbarth cymdeithasol neu fod yn ynysig yng nghefn gwlad.

Rydyn ni'n gwybod nad yw pob un ohonom yn cael yr un cyfleoedd ac felly mae angen i elusennau gydnabod hyn ac addasu'r cymorth a'r mynediad at wasanaethau yn unol â hynny.

Rydyn ni eisiau gweithio mewn partneriaeth ag elusennau sy'n dangos eu bod nhw'n:

- deall cyfansoddiad y cymunedau maent yn eu cefnogi ac yn gweithio gyda nhw.
- cydnabod y bobl yn y cymunedau hynny sy'n profi annhegwch
- mynd ati'n rhagweithiol i gyrraedd ac ymgysylltu â phobl er mwyn mynd i'r afael â'r annhegwch maent yn ei brofi.
- yn gynhwysol ac yn gwneud i bobl deimlo eu bod yn cael eu croesawu, eu gwerthfawrogi a'u bod yn perthyn.

Nid ydym yn chwilio am berffeithrwydd ond rydym eisiau deall eich dull gweithredu a'ch ffordd o feddwl am sicrhau eich bod yn cefnogi pobl sydd wedi wynebu rhwystrau ac annhegwch.

**ENGHRAIFFT:** Mae elusen sydd wedi ei lleoli ym Manceinion yn sicrhau bod ei gwybodaeth, ei chyhoeddusrwydd, ei gwefan a'i chyfryngau cymdeithasol yn hygyrch ac yn darparu gwybodaeth mewn gwahanol ieithoedd. Mae'n defnyddio dehonglwyr ac arwyddwyr lle bo angen.

Mae'r elusen yn darparu cefnogaeth ddiwylliannol gymwys i bobl o gymuned leiafrifol lle cafodd torri/anffurfio organau cenhedlu benywod (FGM/C) ei ymarfer. Mae hefyd wedi datblygu Canllawiau Cyfryngau manwl ar gyfer newyddiadurwyr (ac eraill) nid yn unig i ddeall materion trais ar sail anrhydedd ac arferion niweidiol ond hefyd i'w cefnogi i gyfathrebu'n sensitif â goroeswyr.

Mae un o'i lysgenhadon yn rhannol ddall, ac mae wedi bod yn ei chefnogi'n frwd i sicrhau bod y wefan a'r adnoddau'n hygyrch e.e. rhoi recordiad llais ac is-deitlau ar y fideos, a darparu iaith arwyddion fel rhan o'u digwyddiadau.

Fel sefydliad, mae'r elusen yn parhau i ddysgu a datblygu er mwyn creu amgylchedd cynhwysol, cefnogol, priodol a diogel i bawb.



✔ **Cynnwys pobl sydd â phrofiad uniongyrchol o'r materion rydych chi'n gweithio i fynd i'r afael â nhw**

Byddwn yn blaenoriaethu elusennau sy'n dangos eu bod yn cynnwys pobl sydd â phrofiad uniongyrchol yn y gwaith o arwain eich sefydliad a chynllunio a darparu eich gwasanaethau. Byddwn hefyd yn blaenoriaethu elusennau sy'n dangos yn gryf eu bod yn awyddus i ddatblygu eu hymarfer yn y maes hwn.

Wrth sôn am brofiad bywyd, rydyn ni'n golygu pobl sy'n cael eu heffeithio'n uniongyrchol gan y materion mae eich sefydliad yn ceisio mynd i'r afael â nhw.

Er enghraifft, elusen Cam-drin rhywiol ac Ecsploetiaeth yn cael ei harwain gan bobl sydd â phrofiad o gam-drin rhywiol ac ecsploetiaeth.

Bydd eich elusen yn gallu disgrifio sut mae'r bobl mae'n eu cefnogi yn cael eu cynnwys yn ystyrllon mewn penderfyniadau, dylanwadu mewnol ac allanol, ymgysylltiad dinesig a/neu rolau llywodraethu. Gallai hyn gynnwys cyfarfodydd gwybodaeth, fforymau, neu grŵp llywio/cynghori sy'n chwarae rhan wrth gefnogi gwaith llywodraethu'r elusen.

**ENGHRAIFFT:** Mae gan elusen ym Mryste bobl sydd wedi cael eu cam-drin a'u hecsbloetio'n rhywiol yn ei thimau Arweinyddiaeth a Therapiwteg. Mae cleientiaid wedi siapio'r gwaith o ddatblygu a darparu eu gwasanaethau drwy ddarparu adborth rheolaidd, sy'n cael ei ddefnyddio i addasu eu gwaith. Mae pobl sydd â phrofiad uniongyrchol yn cymryd rhan yn y broses gyfweld ac yn eistedd ar baneli cyfweld

Mae gan ei brosiectau grŵp Llais yr Aelodau sy'n trafod gwahanol agweddau ar y prosiect yn rheolaidd a sut gellir ei wella, gan helpu i ddylanwadu ar weithgareddau a'u llywio yn y dyfodol. Mae rhai sesiynau hefyd yn cael eu harwain gan aelodau eu hunain.

Mae'r elusen yn recriwtio ymddiriedolwyr sydd â phrofiad uniongyrchol i ymuno â'r Bwrdd, ac maent yn cydnabod gwerth cael yr arbenigedd hwn ar lefel strategol.





### ✔ **Dealltwriaeth o drawma a dulliau sy'n seiliedig ar gryfderau**

Dull yw Gofal a Oleuir gan Drawma y mae sefydliadau yn ei fabwysiadu er mwyn gwella ymwybyddiaeth o drawma a'i effaith ar ddatblygiad niwrolegol, biolegol, seicolegol a chymdeithasol unigolyn, i sicrhau bod y gwasanaethau sy'n cael eu darparu yn cynnig cymorth effeithiol ac, yn bennaf oll, nad ydynt yn achosi trawma o'r newydd i'r rhai sy'n manteisio ar y gwasanaethau neu'n gweithio ynddynt.

Er mwyn mynd i'r afael ag anghenion pobl sydd wedi profi cam-drin a/neu gamfanteisio'n rhywiol, mae'n hollbwysig gwerthfawrogi effaith y trawma maen nhw wedi'i ddiodeff. Byddwn yn ffurfio partneriaeth ag elusennau sy'n deall effaith eang trawma, pethau sy'n ei sbarduno, a symptomau trawma yn y bobl maent yn eu cynorthwyo, a'r llwybrau posibl ar gyfer adferiad. Bydd hyn hefyd yn cynnwys effaith trawma uniongyrchol ac anuniongyrchol ar staff a gwirfoddolwyr.

Bydd y cymorth yn cynnwys meithrin cysylltiadau cadarnhaol drwy roi anghenion unigol wrth galon eich cefnogaeth, eu helpu i adeiladu rhwydweithiau cefnogi y tu allan i'ch elusen, gan ganolbwyntio ar nodi cryfderau a nodau unigol a phersonol, sy'n helpu pobl i gymryd cyfrifoldeb dros eu taith adferiad, gan roi dewis a rheolaeth iddynt.

### ✔ **Cefnogi datblygu sefydliadol**

Rydyn ni eisiau helpu elusennau i dyfu'n gryfach ac yn fwy gwydn er mwyn iddynt allu ffynnu y tu hwnt i oes ein cyllid. Byddwn yn canolbwyntio ar elusennau a all elwa fwyaf ar ein cymorth datblygu sefydliadol, ac nid dim ond y cyllid anghyfyngedig.

Gan hynny, dim ond elusennau sy'n gallu dangos eu bod yn deall eu heriau sefydliadol eu hunain ac sydd â'r diddordeb a'r parodrwydd i fuddsoddi amser ac ymdrech i fynd i'r afael â'r rhain a'u perchenogi y byddwn ni'n eu cyllido.

Bydd hyn yn gofyn am ymrwymiad gan arweinwyr yr elusen a'r Ymddiriedolwyr a gallai fod yn unrhyw beth o wella trefniadau llywodraethu, cynyddu amrywiaeth ar draws y sefydliad neu gyflwyno cronfa ddata. Mae rhagor o wybodaeth am ein dull gweithredu ar ein gwefan.

Mae'n bwysig i ni ein bod yn datblygu perthynas gymeradwy gyda chi a'ch elusen er mwyn i ni allu darparu'r gefnogaeth sydd fwyaf addas i'r hyn rydych chi'n gobeithio mynd i'r afael ag ef. Er mwyn gwneud hyn, byddwn yn siarad â chi neu'n ymweld â'ch elusen ychydig o weithiau'r flwyddyn.



## ✔ **Lleoliad daearyddol**

Rydym eisiau gwneud yn siŵr ein bod ni'n cyllido elusennau bach arbenigol ledled Cymru a Lloegr. Yn ein rhaglen ar gyfer elusennau arbenigol yn 2023, fe wnaethom fuddsoddi llai o gyllid yng **Nghymru, Llundain, a rhanbarthau Gogledd-ddwyrain a De-orllewin Lloegr**. Gan hynny, er mwyn mynd i'r afael â'r anghydbwysedd, lle ceir ceisiadau tebyg sy'n bodloni'r rhaglen a meini prawf blaenoriaethu, byddwn yn ffafrio ceisiadau o Gymru a'r tri rhanbarth hyn.

## **7. Yr hyn nad ydym yn ei gyllido o dan y rhaglen hon**

Nid ydym yn darparu cyllid ar gyfer y sefydliadau canlynol:

- ✘ Cwmnïau Buddiannau Cymunedol, neu unrhyw sefydliadau eraill nad ydynt yn elusennau nac yn Sefydliadau Corfforedig Elusennol (CIO) sydd wedi'u cofrestru yng Nghymru a Lloegr.
- ✘ Sefydliadau seilwaith neu ambarél.
- ✘ Sefydliadau sydd â'r prif bwrpas o roi arian i unigolion neu sefydliadau eraill. Mae hyn yn golygu sefydliadau sy'n defnyddio mwy na 50% o'u gwariant blynyddol fel grantiau.
- ✘ Elusennau sy'n gweithio'n bennaf y tu allan i Gymru a Lloegr.
- ✘ Sefydliadau sy'n ei gwneud yn ofynnol i bobl gymryd rhan mewn gweithgarwch crefyddol yn rhan o'r gwasanaethau a ddarperir, oni bai fod yr elusen wedi ei sefydlu i gefnogi pobl yn benodol o'r ffydd honno.
- ✘ Ysbytai, awdurdodau iechyd, neu hosbisau.
- ✘ Gwasanaethau achub.
- ✘ Ysgolion, colegau neu brifysgolion.